



13. maj 2026

UPA2026/151

Meerarsiat meeqqat allat assigalugit feriarnissaminnut, ilaqutariittullu inuunissaminnut periarfissaqarnissaat qanoq sulissutigisinnaaneripput pillugu, apeqquteqaat aallaavigalugu oqallinnissamik siunnersuut

(Inatsisartunut ilaasortaq Pipaluk Olsen, Demokraatit)

Siullermik Pipaluk Olsenimut Demokraatineersumut pingaarutilimmik inuit ulluinnaannut attuumassuteqartumik apeqquteqaat aallaavigalugu oqallisissamik saqqummiussisimaneranut qujanaq.

Siullertut Siumumiit oqaatigissavarput angajoqqaarsiaqartitsisarneq tapersensoratsigu. Toqqissisimaneq, aalajaassuseq aammalu isumassuineq inuiaqatigiinni meeqqat immikkut pisariaqartitsisut akornanni pilersittarpaat. Tamanna akisussaaffiuvoq ataqqinarteq aammalu pitsaasunik atugassaqartitsinermik pisariaqartitsisoq.

Isumaqatigaarput ilaqutariittut inuuneq ulluinnarni aaqqissuussaaneermik kisimi tunngaveqanngitsoq, aammali ataatsimoorluni misigisassanik imaqarteq. Sulinngiffeqarnerit pingaarutilimmik inissisimapput attaveqarnermik nukittorsaanissamut aammalu attuumassuteqarnermik pilersitsinissamut - pingaartumik meeqqanut sumiginnarneqarnermik aalajaatsuunnginnermillu misigisaqartunut. Taamaattumik aamma pingaaruteqarluinnarpoq qanoq inuiaqatigiittut qulakkiissagipput meeqqat angajoqqaarsiallit meeqqat allat assigalugit periarfissaqarnissaat.

Siumup tunngaviusumik isumaqarfigaa meeqqat tamarmik Kalaallit Nunaanni pitsaasumik inuuneqarnissamut assigiimmik periarfissaqartariaqartut, peroriartorfii apeqqutaatinngit aammalu nuna tamakkerlugu sumi najugaqarnerat apeqqutaatinngit. Kommuunit akornanni ingerlatsinermi assigiinngissutsit maannakkutut ittut ernumanartoqartitsipput. Periarfissat meeqqap pisariaqartitaanit pinnatik sumi najugaqarneranit aalajangerneqartillugit ilungersunartumik isiginiagassaavoq. Kommuunini tamani danmarkip tungaanut angalanissamut qinnuteqarsinnaatitaaneq piuvoq, taamaattorli kommuuniniit kommuuninut aningaasaqassuseq aallaavigalugu atugassarititat assigiinngissitalutik.

Taamaakkaluartoq Siumut isumaqarpoq aaqqiissutissat eqqarsaatigilluagaasumik nassaarineqartariaqartut. Nuna tamakkerlugu sulinngiffeqarnermi angalanissamut aaqqissuussineq soqutiginarpoq pitsaasunillu siunertaqarpoq. Peqatigisaanik apeqqutinik saqqummiussivoq soorlu aningaasatigut pingaarnersiuneq, kommunit qanoq inissisimanagerat aammalu suliameq ataasiakkaani eqaatsumik ingerlatsinissamik pisariaqartitsineq, kiisalu aamma inissaminiinnassasoq kommuunit aningaasatigut tapiissutisiatik siunertaannut atortarneraat misissussallugu. Qularnaartariaqarparput aaqqissuussineq periarfissaajumaartoq meeqqap pisariaqartitaanut aallaaveqartoq aammalu allanngorarsinnaasumik atorneqarsinnaasoq. Tassami meeraq angajoqqaarsiami sulinngiffeqarlutik angalaneranni ulloq unnuarlu angerlarsimaffimmut inissinneqartassaguni tamanna aamma meeqqap toqqissisimanageranut pisariaqartitaanullu naapertuutinngilaq, tunngavilersuutigissagaannilu aningaasat



tapiissutit angalanermut annertuallaarnissaat taava ulloq unnuarlu angerlarsimaffimmut aningaasartuutigisassat aamma sanilliunneqarsinnaapput annertuneruinnannginnersulluunniit.

Taamaattumik Siumumiit pitsaasutut isigaarput kommuunit akornanni assigiinnerusumik sinaakkusiinissamut sulineq ingerlaqqittariaqartoq. Assersuutigalugu tamanna pisinnaavoq nuna tamakkerlugu malittarisassat imaluunniit minnerpaamik piunasaqaatit aqutigalugit, qulakkeerisumik meeqqat tamarmik sulinngiffeqarnermi angalanissamut ilaqtariittullu inuuneqarnissamut periarfissaqarnissaat.

Aamma isumaqarpugut pingaaruteqartoq kommunit aammalu ilaqtariit angajoqqaarsiat sulinermit peqataatinnegarnissaat. Taakku ulluinnarni misilittakkaminnik ilisimasaqarluarput aammalu pisariaqartitat sumi annerunersut nalunngilaat. Peqatigisaanik aningaasatigut kingunerisassat ersarissumik takusariaqarpavut aammalu aningaasat meeqqat iluaqtiginerpaasaannut atornegarnissaat qulakkeertariaqarparput

Naggasiutigalugu Siumumiit erseqqissassavaatigissavarput sulinngiffeqarneq apeqqutaanani meeqqat atugarissaarnerat, attuumassuteqarnissaat aammalu inuuniarnermi assigiimmik periarfissaqarnissaat pineqarmat. Tamanna akisussaaffiuvoq tamatsinnut ataatsimoorussassaq.

Neriutigaarput pitsaasumik oqallinneq aammalu aaqqiissutissanik meeqqat angajoqqaarsiallit aammalu ilaqtariit angajoqqaarsiat nunatsinni tamarmi atugaat pitsaanerulersillugit suleqatigiissutigineqarnissaat ingerlaqqiumaartoq.

Erik Jensen, Siumut